

**INTERNACIONALNI BURČ UNIVERZITET
INTERNATIONAL BURCH UNIVERSITY**



PRAVILA STUDIRANJA ZA DRUGI CIKLUS STUDIJA

GRADUATE RULES OF STUDY

S A D R Ž A J

I. OPĆE ODREDBE	3
Predmet i definicija	3
II. UPIS	3
Upis na drugi ciklus studija	3
Poznavanje engleskog jezika	3
Postupak upisa	4
Ugovor o studiranju	4
Upis stranih državljana	4
III. UPIS PUTEM PRIJELAZA (TRANSFERI STUDENATA)	4
Upis putem prijelaza - transfera	4
Priznavanje ispita	5
Upis na pripremni program iz engleskog jezika	5
IV. ORGANIZACIJA DRUGOG CIKLUSA STUDIJA	6
Organizacija	6
Studij na daljinu	6
Vanredni studij	6
Prisustvo na nastavi	7
Konsultativna nastava	7
V. ZAJEDNIČKI I INTERDISCIPLINARNI STUDIJSKI PROGRAMI	7
Organizacija zajedničkog ili interdisciplinarnog studija	7
Ugovor o realizaciji multidisciplinarnog, transdisciplinarnog i/ili interdisciplinarnog studija	7
VI. VREDNOVANJE RADA STUDENATA	8
Postupak provjere znanja	8
Ocjenjivanje	8
Prosjek ocjena	9
VII. GUBITAK STATUSA STUDENTA	9
Razlozi za prestanak statusa studenta	9

VIII. MAGISTARSKI PROGRAM SA ILI BEZ ZAVRŠNOG RADA	9
Oblici magistarskog programa	9
IX. TRAJANJE DRUGOG CIKLUSA STUDIJA	9
Organizacija studijske godine	9
X. IMENOVANJE MENTORA	10
Postupak imenovanja	10
XI. ZAVRŠNI RAD	10
Definicija i oblici završnog rada	10
Kriteriji za odbranu završnog rada	11
Provjera završnog rada	12
XII. KOMISIJA ZA OCJENU I ODBRANU ZAVRŠNOG RADA	13
Imenovanje komisije i zakazivanje odbrane završnog rada	13
Odbrana završnog rada	14
Repozitorij završnih radova	14
Zaštita rezultata istraživanja završnog rada	14
XIII. ISPRAVE I EVIDENCIJE O STUDIJU	15
Diploma	15
XIV. PRELAZNE I ZAVRŠNE ODREDBE	15
Primjena drugih propisa	15
Stupanje na snagu	15

Na osnovu člana 61. Zakona o visokom obrazovanju Kantona Sarajevo („Službene novine Kantona Sarajevo“ br. 36/22), a u vezi sa čl. 36. i čl. 153. Statuta visokoškolske ustanove Internacionalni Burč univerzitet – International Burch University, Senat Internacionalnog Burč univerziteta je na svojoj 201. sjednici, održanoj dana 27.09.2023. godine, usvojio sljedeća

**PRAVILA STUDIRANJA ZA DRUGI CIKLUS STUDIJA
NA VISOKOŠKOLSKOJ USTANOVI INTERNACIONALNI BURČ UNIVERZITET –
INTERNATIONAL BURCH UNIVERSITY**

I. OPĆE ODREDBE

**Član 1.
(Predmet i definicija)**

- (1) Pravilima studiranja drugog ciklusa studija visokoškolske ustanove Internacionalni Burč univerzitet – International Burch University (u daljem tekstu: Pravila) uređuje se upis na studij drugog ciklusa, organizacija i izvođenje drugog ciklusa studija uključujući studij na daljinu i vanredni studij, organizacija zajedničkih i interdisciplinarnih programa, vrednovanje rada studenata, gubitak statusa studenta, struktura magistarskih programa, trajanje studija, postupak imenovanja mentora, prijave i odbrane završnog rada, te druga pitanja od značaja za realizaciju studija za sticanje zvanja magistra na visokoškolskoj ustanovi Internacionalni Burč univerzitet – International Burch University (u daljem tekstu: Univerzitet).
- (2) Riječi muškog ili ženskog roda upotrijebljene u ovim Pravilima se koriste neutralno i odnose se jednako na muški i ženski rod.

II. UPIS

**Član 2.
(Upis na drugi ciklus studija)**

- (1) Upis na drugi ciklus studija vrši se na osnovu javnog konkursa koji objavljuje Univerzitet, o čemu odluku donosi Senat Univerziteta.
- (2) Broj studenata za upis na drugi ciklus studija utvrđuje Senat Univerziteta, uz saglasnost osnivača Univerziteta.
- (3) Pravo upisa na drugi ciklus studija imaju kandidati sa završenim odgovarajućim prvim ciklusom studija.
- (4) Kandidat koji je ispunio uslov iz stava (3) ovog člana ima pravo upisa i na programe iz drugih oblasti koje se razlikuju od oblasti studijskog programa prvog ciklusa studija koji je završio, pod uslovima koje utvrdi vijeće fakulteta.
- (5) Rangiranje kandidata vrši se na osnovu posebne odluke koju usvaja Senat Univerziteta prije raspisivanja konkursa za upis na drugi ciklus studija.

**Član 3.
(Poznavanje engleskog jezika)**

- (1) Nastava na drugom ciklusu studija se izvodi na engleskom jeziku izuzev Odsjeka za orijentalnu filologiju na kojem se nastava izvodi na turskom jeziku.
- (2) Da bi student mogao pohađati nastavu, mora imati određeni nivo znanja iz engleskog jezika, odnosno turskog jezika na Odsjeku za orijentalnu filologiju.

- (3) Nivo znanja engleskog, odnosno turskog jezika kandidata ocjenjuje se prema rezultatu ispita iz poznavanja predmetnog jezika ili ekvivalentnim rezultatima postignutim na drugim ispitima iz poznavanja predmetnog jezika koje odredi Senat Univerziteta.
- (4) Za upis na naučni stepen magistra, Senat Univerziteta utvrđuje prihvatljiv rezultat postignut na ovim ispitima.

Član 4. **(Postupak upisa)**

- (1) Za provođenje postupka rangiranja vijeće fakulteta imenuje posebnu komisiju koja sačinjava preliminarnu listu primljenih kandidata i izvještaj o rezultatima upisa dostavlja vijeću.
- (2) Preliminarna lista se objavljuje na oglasnoj ploči fakulteta najkasnije dva dana od posljednjeg dana polaganja prijemnog ispita/intervjua, a na istu zainteresirani kandidati imaju pravo prigovora u roku od tri dana.
- (3) Vijeće donosi odluku po prigovoru u roku od tri dana, te dostavlja listu primljenih kandidata Senatu Univerziteta radi usvajanja konačne liste za sve fakultete.
- (4) Kandidati sa istim brojem bodova imaju jednako pravo upisa.
- (5) Konačna lista primljenih kandidata objavljuje se na oglasnoj ploči Univerziteta, odnosno fakulteta najkasnije dva dana nakon isteka roka za donošenje odluke po izjavljenom prigovoru.
- (6) Kandidat koji je ostvario pravo na upis, a u predviđenom roku nije izvršio upis, gubi pravo upisa, a umjesto njega pravo na upis stiže sljedeći kvalifikovani kandidat na rang listi.
- (7) Rektor Univerziteta dostavlja nadležnom Ministarstvu spisak svih upisanih studenata u prvu godinu studija na nivou Univerziteta najkasnije sedam dana prije početka studijske godine.

Član 5. **(Ugovor o studiranju)**

Student sa Univerzitetom zaključuje ugovor o studiranju, kojim se bliže uređuju njihova međusobna prava i obaveze.

Član 6. **(Upis stranih državljana)**

Strani državljani imaju pravo upisa na studij drugog ciklusa pod jednakim uslovima kao i državljani Bosne i Hercegovine u skladu sa Zakonom.

III. UPIS PUTEM PRIJELAZA (TRANSFERI STUDENATA)

Član 7. **(Upis putem prijelaza - transfera)**

- (1) Studentu koji je trenutno upisan na naučni stepen magistra na nekoj drugoj visokoškolskoj ustanovi u Bosni i Hercegovini ili inostranstvu, po dostavljanju svih potrebnih dokumenata, može se odobriti transfer samo na isti ili srodan studijski program.
- (2) Studentu koji prelazi na Internacionalni Burč univerzitet sa drugog univerziteta mora se organizovati ispit iz znanja engleskog jezika (osim ukoliko priloži prihvatljiv dokaz o poznavanju engleskog jezika o čemu odlučuje vijeće fakulteta), odnosno turskog jezika ukoliko se upisuje na Odsjek za orijentalnu filologiju.
- (3) Transfer odobrava dekan, a na osnovu odluke vijeća na način utvrđen ovim Pravilima, Statutom i drugim općim aktima Univerziteta.
- (4) Studenti koji su trenutno upisani na naučni stepen magistra na jednom od studijskih programa Univerziteta imaju mogućnost da izaberu neki drugi studijski program koji vodi do naučnog stepena magistra, pod uslovima koje odredi vijeće fakulteta.

- (5) Studenti koji su upisani na redovan studij u okviru drugog ciklusa studija, imaju mogućnost transfera na studij na daljinu (u daljem tekstu: DL studij) u okviru istog studijskog programa i obratno, uz ispunjavanje proceduralnih i finansijskih uslova za transfer.
- (6) Pravo na prelazak može se ostvariti prije početka nastave u semestru, odnosno uz odobrenje vijeća organizacione jedinice i nakon početka nastave u semestru.
- (7) Transfer iz stava (5) ovog člana odobrava dekan fakulteta na zahtjev studenta.

Član 8. (Priznavanje ispita)

- (1) Studentu koji je položio ispit na drugom studijskom programu priznaje se polozeni ispit, ako predmet iz kojeg je ispit položen, po svojoj sadržini i obimu odgovara predmetu koji je student upisao, što se dokazuje dokumentima predviđenim ECTS pravilima.
- (2) Ako predmet iz kojeg je ispit položen po svojoj sadržini i obimu približno odgovara predmetu koji je student upisao, nastavnik može priznati ispit u cjelini ako je ocijenio da je student kroz obrađeni i položeni program stekao znanje i vještine u mjeri dovoljnoj za priznavanje ispita.
- (3) Priznavanjem ispita priznaje se i ocjena kojom je student ocijenjen na ispitu.
- (4) Broj bodova priznatog ispita utvrđuje se u skladu sa pravilima ECTS i važećim nastavnim planom i programom studenta.
- (5) Ako postoji znatna razlika u nastavnim planovima i programima položenih predmeta, utvrđuje se odgovarajuća razlika predmeta ili dijela predmeta koje je student dužan položiti.
- (6) Nakon okončanja postupka priznavanja položenih ispita, studentu prelazniku utvrđuje se status studenta na Univerzitetu.
- (7) Za provođenje procedure iz prethodnih stavova vijeće organizacione jedinice na prijedlog šefa odsjeka može imenovati posebnu komisiju.
- (8) Komisija iz prethodnog stava broji između tri i pet članova iz reda akademskog osoblja u zvanju nastavnika (docent/vanredni profesor ili redovni profesor).
- (9) Student je dužan da u daljem školovanju na Univerzitetu položi utvrđenu razliku ispita i da stekne broj kredita/bodova predviđenih za upis u narednu godinu studija u skladu sa odredbama ovih Pravila.
- (10) Detaljna procedura i procesi u pogledu prelaza studenata i priznavanja ispita uređuju se posebnim pravilnikom kojeg usvaja Senat.

Član 9. (Upis na pripremni program iz engleskog jezika)

- (1) Kandidati za koje se utvrdi da ispunjavanju uslove za upis na drugi ciklus studija, ali nisu uspjeli položiti ispit iz poznavanja engleskog jezika ili nisu polagali ispit iz znanja engleskog jezika, upućuju se na usavršavanje koje organizuje Pripremna škola engleskog jezika.
- (2) Po završetku usavršavanja, kandidati su obavezni položiti ispit iz poznavanja engleskog jezika u okviru Pripremne škole ili ekvivalentni ispit u drugoj instituciji koja organizira takve vidove usavršavanja o čijoj prihvatljivosti odlučuje vijeće fakulteta.

IV. ORGANIZACIJA DRUGOG CIKLUSA STUDIJA

Član 10. (Organizacija)

- (1) Univerzitet, odnosno fakulteti organizuju i realizuju drugi ciklus studija iz oblasti za koje su matični.
- (2) Nastava se organizuje u dva semestra: zimski i ljetni.
- (3) Senat Univerziteta najkasnije 60 (šezdeset) dana prije početka izvođenja nastave za studijsku godinu utvrđuje i objavljuje kalendar organizacije i realizacije nastavnih programa.
- (4) Studij drugog ciklusa se organizuje u punom fondu sati predviđenim nastavnim planom i programom kao redovni studij (15 sedmica kontinuiranih aktivnosti za predmete predviđene nastavnim planom i programom ili kroz sistem modularne nastave), kao studij na daljinu ili kao vanredni studij.
- (5) U izuzetnim okolnostima nastava može trajati i kraće i izvoditi se u drugom obliku, o čemu odluku donosi Senat univerziteta uz obavezu realizacije propisanog fonda sati.
- (6) Ljetni odmor traje najduže 8 (osam) sedmica.
- (7) Univerzitet može odobriti izmjenu oblika realizacije nastavnog procesa ako je članu akademskog osoblja opravdano spriječen da izvodi nastavu, a posebno ako mu je odobreno odsustvo radi naučnog, umjetničkog ili stručnog usavršavanja ili obavljanja aktivnosti od posebnog interesa za Univerzitet.
- (8) Odluku o izmjeni oblika realizacije nastavnog procesa iz stava (7) ovog člana donosi Senat Univerziteta na prijedlog vijeća fakulteta.

Član 11. (Studij na daljinu)

- (1) Studij na daljinu (u daljem tekstu: DL studij) predstavlja oblik studija u okviru kojeg se korištenjem naprednih kompjuterskih tehnologija i interaktivnih nastavnih materijala osigurava izvođenje nastavnog procesa jednako tradicionalnom obliku studiranja.
- (2) Studenti upisani na DL studij svoje nastavne obaveze izvršavaju u virtuelnoj učionici koja podrazumijeva izvođenje nastave posredstvom interneta, odnosno DL platforme (sa udaljene lokacije nastavnog osoblja i studenata).
- (3) Univerzitet realizira DL studij za studijske programe u okviru kojih je predviđen upis studenata na takav oblik studija.
- (4) DL studij se realizira sukladno Standardima i normativima za obavljanje djelatnosti visokog obrazovanja na području Kantona Sarajevo (u daljem tekstu: Standardi i normativi) na način da se minimalno 1/3 nastave redovnog studija realizira online.
- (5) Tačan fond sati koji se realizira online u okviru DL studija, te druge specifičnosti realizacije ovog oblika studija utvrđuje Senat usvajanjem općih i pojedinačnih akata.
- (6) Kada se nastava na DL studiju u potpunosti realizira online, ispiti se obavezno organiziraju u sjedištu Univerziteta, osim u slučaju prirodnih ili drugih nepogoda kada studenti pristupaju ispitima putem DL platforme Univerziteta.
- (7) O ispitima koji se održe na način iz stava (6) ovog člana, vodi se uredna evidencija.
- (8) Detaljna organizacija DL studija uređuje se posebnim pravilnikom koji usvaja Senat.

Član 12. (Vanredni studij)

- (1) Vanredni studij je oblik studija koji se realizira u fondu sati prilagođenom studentima koji nisu u mogućnosti pohađati redovni studij.
- (2) Detaljna organizacija vanrednog studija uređuje se posebnim pravilnikom kojeg usvaja Senat.

Član 13.
(Prisustvo na nastavi)

Studenti upisani na redovni studij obavezni su prisustvovati na svim nastavnim aktivnostima u minimalnom iznosu od 70% od predviđenog fonda sati za takve oblike izvođenja nastave, dok studenti upisani na vanredni studij i studij na daljinu (DL) nisu obavezni prisustvovati nastavnom procesu.

Član 14.
(Konsultativna nastava)

- (1) Ako je na određeni studijski program upisano manje od 5 studenata, Univerzitet može organizirati konsultativnu nastavu.
- (2) Način organizacije i izvođenja konsultativne nastave uređuje se posebnom odlukom koju usvaja vijeće fakulteta.

V. ZAJEDNIČKI I INTERDISCIPLINARNI STUDIJSKI PROGRAMI

Član 15.
(Organizacija zajedničkog ili interdisciplinarnog studija)

- (1) Univerzitet može organizovati i izvoditi studij drugog ciklusa iz jedne ili više naučnih/umjetničkih oblasti, na dva ili više fakulteta Univerziteta ili zajedno sa drugom visokoškolskom ustanovom iz zemlje ili inostranstva (multidisciplinarni, transdisciplinarni i/ili interdisciplinarni studijski program) u skladu sa Zakonom.
- (2) Multidisciplinarne, transdisciplinarne i/ili interdisciplinarne studijske programe mogu organizovati fakulteti iz naučnih/umjetničkih oblasti za koje su matični.
- (3) U organizaciji studija iz prethodnog stava, Univerzitet može realizirati program za sticanje dvojnih ili zajedničkih diploma.
- (4) Prijedlog o organizovanju zajedničkog ili interdisciplinarnog studijskog programa pokreće vijeće fakulteta.
- (5) Za realizaciju zajedničkog ili interdisciplinarnog studija Senat Univerziteta usvaja prethodno mišljenje, te pribavlja saglasnost nadležnog Ministarstva.
- (6) Predlagači zajedničkog ili interdisciplinarnog studija utvrđuju program, koji je usvojen od strane nadležnih tijela svih učesnika u programu.

Član 16.
(Ugovor o realizaciji multidisciplinarnog, transdisciplinarnog i/ili interdisciplinarnog studija)

Program realizacije studija iz prethodnog člana uređuje se posebnim ugovorom kojim se, između ostalog, regulišu sljedeća pitanja:

- a) uvjeti i načini realizacije nastave;
- b) akademska titula i stručno zvanje/zvanja koja se stiču nakon završetka studija;
- c) cijena studija;
- d) sadržaj i izgled diplome;
- e) procedure odobravanja i odbrane završnog rada,
- f) korištenje prostora i opreme;
- g) uvjeti sticanja i raspoređivanja sredstava;
- h) rukovođenje studijem;
- i) kod koga će se voditi evidencija o studentu (upis, izdavanje uvjerenja, diploma i sl.);
- j) druga prava i obaveze organizatora multidisciplinarnog, transdisciplinarnog i/ili interdisciplinarnog studijskog programa.

VI. VREDNOVANJE RADA STUDENATA

Član 17. (Postupak provjere znanja)

- (1) Studenti moraju sredinom semestra polagati parcijalni ispit i/ili završiti druge zadane projekte/domaće zadatke tokom semestra, te uz to moraju polagati završni ispit i/ili kompletirati završni projekt radi ocjene iz predmeta.
- (2) Datumi završnih ispita određuju se akademskim kalendarom za svaku studijsku godinu.
- (3) Završnu ocjenu studentima daje predmetni nastavnik.
- (4) Završna ocjena se bazira na ocjenama iz parcijalnog ispita, završnog ispita, završnog projekta i/ili drugih oblika provjere znanja u skladu sa silabusom svakog pojedinačnog predmeta.
- (5) Provjere znanja za studente u svim statusima se u pravilu obavljaju u prostorijama Univerziteta.
- (6) Izuzetno, za redovne, vanredne i DL studente provjere znanja uključujući parcijalne i završne ispite se mogu organizirati i putem online platforme Univerziteta, a svaki oblik provjere znanja organiziran na takav način se obavezno pohranjuje u univerzitetsku bazu podataka.
- (7) Student se obavezuje da izvrši prijavu ispitnih obaveza putem studentskog informacionog sistema (SIS) u svim ispitnim rokovima, u protivnom predmetni nastavnik zadržava pravo da ne ocijeni onog studenta koji nije uredno izvršio obavezu prijavljivanja ispitne obaveze.

Član 18. (Ocjenjivanje)

- (1) Univerzitet primjenjuje sljedeći sistem ocjenjivanja:

Procenat/Broj bodova	Slovna ocjena iz predmeta	Brojčana ocjena iz predmeta
95-100	A	10
85-94	B	9
75-84	C	8
65-74	D	7
55-64	E	6
54 i niže	F	5

- (2) Za pojedine predmete predviđene nastavnim planom i programom ocjenjivanje i vrednovanje studenata se može izraziti slovnim ocjenama (P – položio i N – nije položio).
- (3) Odluku o ocjenjivanju studenata u skladu sa odredbom iz prethodnog stava donosi Senat na prijedlog vijeća fakulteta.

Član 19.
(Prosjeak ocjena)

- (1) Prosjeak ocjena studenta računa se korištenjem ponderirane aritmetičke sredine svih ocjena u toku ciklusa studija.
- (2) Sve ocjene se prikazuju na transkriptu/uvjerenju o položenim ispitima studenta.

VII. GUBITAK STATUSA STUDENTA

Član 20.
(Razlozi za prestanak statusa studenta)

Status studenta prestaje iz sljedećih razloga:

- a) okončanjem ciklusa studija;
- b) ispisom sa Univerziteta;
- c) isključenjem po postupku i uz uslove utvrđene Zakonom, Statutom ili drugim odgovarajućim aktom Univerziteta;
- d) ako prijedlog završnog rada studenta bude odbačen od strane nadležne komisije dva puta;
- e) ako studenti ne završe studijski program u predviđenom roku;
- f) iz drugih razloga predviđenih aktima Univerziteta.

VIII. MAGISTARSKI PROGRAM SA ILI BEZ ZAVRŠNOG RADA

Član 21.
(Oblici magistarskog programa)

- (1) Studijski program drugog ciklusa studija može biti organizovan sa ili bez završnog rada.
- (2) Magistarski program sa završnim radom može biti organiziran u trajanju od jedne ili dvije studijske godine, u zavisnosti od trajanja prvog ciklusa studija.
- (3) Magistarski program bez završnog rada isključivo se organizuje u trajanju od jedne studijske godine.
- (4) O transferu sa jednog na drugi oblik magistarskog programa iz stava (1) ovog člana, na zahtjev studenta odlučuje vijeće fakulteta.

IX. TRAJANJE DRUGOG CIKLUSA STUDIJA

Član 22.
(Organizacija studijske godine)

- (1) Studij za sticanje kvalifikacije drugog ciklusa studija na svakom odsjeku traje jednu odnosno dvije godine, ili dva odnosno četiri semestra redovnog studiranja, a vrednuje se sa najmanje 60 (šezdeset) odnosno najmanje 120 (stotinu dvadeset) ECTS studijskih bodova, i to tako da u zbiru sa prvim ciklusom nosi 300 (tri stotine) ECTS studijskih bodova.
- (2) Studijski program drugog ciklusa studija Univerzitet organizuje na način da se studenti nakon završetka prvog ciklusa, vrednovanog sa najmanje 240 (dvije stotine četrdeset) ECTS bodova, upisuju na drugi ciklus studija

koji traje jednu godinu i vrednuje sa najmanje 60 (šezdeset) ECTS bodova, dok se studenti završenog prvog ciklusa studija, vrednovanog sa najmanje 180 (stotinu osamdeset) ECTS bodova, upisuju na isti studijski program drugog ciklusa koji traje 2 (dvije) godine i vrednuje sa najmanje 120 (stotinu dvadeset) ECTS bodova.

- (3) Senat na prijedlog fakulteta donosi nastavni plan i program na drugom ciklusu studija u trajanju od 1 (jedne) ili 2 (dvije) godine.
- (4) Na osnovu završenog drugog ciklusa studija, studenti se imaju pravo prijaviti na studij trećeg ciklusa studija.
- (5) Odredbe člana kojima se reguliše izvođenje nastave u specifičnim okolnostima, jednako se odnose i na studijske programe drugog ciklusa studija, detaljnije su regulišu odredbama Statuta visokoškolske ustanove Internacionalni Burč univerzitet – International Burch University.

X. IMENOVANJE MENTORA

Član 23. (Postupak imenovanja)

- (1) Imenovanje mentora na drugom ciklusu studija vrši vijeće fakulteta.
- (2) Pri imenovanju mentora iz stava (1) ovog člana, vijeće uzima u obzir pisani prijedlog studenta, te opterećenje nastavnika u pogledu sedmičnog nastavnog fonda sati i postojećih mentorstava.
- (3) Mentor se imenuje iz reda nastavnika zaposlenih na Univerzitetu ili na drugoj visokoškolskoj ustanovi iz naučne/umjetničke oblasti iz koje se radi završni rad/projekat.
- (4) Mentor je dužan da pomaže studentu pri izboru metoda naučnoistraživačkog rada, literature, pripremi strukture rada, kao i da mu pruža stručnu pomoć.
- (5) Ako predmet teme završnog rada/projekta zahtijeva više od jednog mentora, mogu se imenovati dva mentora od kojih je jedan obavezno predmetni nastavnik iz naučne/umjetničke oblasti iz koje se brani završni rad.
- (6) U slučaju ukazane potrebe, vijeće fakulteta može donijeti odluku o zamjeni mentora.

XI. ZAVRŠNI RAD

Član 24. (Definicija i oblici završnog rada)

- (1) Studijskim programom drugog ciklusa studija može biti predviđen završni rad.
- (2) Završni rad je nezavisni rad studenta u kojem se elaborira izabrana tema, naučne i tehničke metode, čime student pokazuje da je savladao studijski program, stekao potrebna znanja i osposobio se za primjenu istih.
- (3) Završni rad podrazumijeva magistarski projekat (magistarski program bez teze) i magistarsku tezu (magistarski program sa tezom).
- (4) Student koji je završio studijsko istraživanje mora napisati završni rad uz poštivanje pravila navedenih u Pravilniku za izradu završnog rada.
- (5) Vrijeme početka izrade završnog rada treba biti usklađeno sa obimom završnog rada tako da student može pristupiti odbrani završnog rada najkasnije do kraja tekuće akademske godine.
- (6) Na prijedlog odsjeka, vijeće fakulteta će prije početka svake akademske godine, a najkasnije do redovne sjednice u oktobru, usvojiti popis tema završnih radova sa prijedlozima mentora za svaku pojedinu temu.

Član 25.
(Kriteriji za odbranu završnog rada)

- (1) Studenti koji uspješno polože predmete predviđene nastavnim planom i programom drugog ciklusa studija obavezni su napisati završni rad na engleskom jeziku (uz izuzetak Odsjeka za orijentalnu filologiju – smjer turski jezik i književnost, na kojem se završni rad piše na turskom jeziku), a nakon toga odbraniti rad pred komisijom za ocjenu i odbranu završnog rada.
- (2) Prijedlog mentora i teme završnog rada student podnosi vijeću fakulteta na propisanom obrascu i to u sljedećem roku:
 - magistarski program u trajanju od dvije godine: prijedlog mentora i teme završnog rada podnosi se najkasnije u toku druge godine studija do redovne sjednice vijeća fakulteta u mjesecu novembru;
 - magistarski program u trajanju od jedne godine: prijedlog mentora i teme završnog rada podnosi se najkasnije do redovne sjednice vijeća fakulteta u mjesecu martu tekuće akademske godine.
- (3) Izuzetno, usljed postojanja opravdanih razloga, rokovi iz prethodnog stava mogu biti produženi uz saglasnost vijeća fakulteta.
- (4) Temu završnog rada student pismeno prijavljuje vijeću fakulteta na propisanom obrascu, a prijava u pravilu sadrži:
 - naziv fakulteta/odsjeka;
 - naziv teme završnog rada;
 - predmet teme završnog rada;
 - obrazloženje/opis teme;
 - datum prijave;
 - ime i potpis mentora;
 - popis osnovne literature.
- (5) Student magistarskog programa sa tezom obavezan je da položi sve ispite prije podnošenja zahtjeva za odbranu završnog rada.
- (6) Student određenog magistarskog programa ima obavezu objaviti članke u toku trajanja magistarskog studija – naučne radove u naučnim indeksiranim časopisima samostalno, u saradnji (koautorstvu) sa mentorom ili drugim koautorima, a koji su u vezi sa oblastima iz koje je završni rad napisan.
- (7) Odredba iz prethodnog stava podrazumijeva da je naučni rad objavljen ili prihvaćen od strane naučnog indeksiranog časopisa, a koji se dokazuje dostavljanjem direktne URL veze ili dokumenta od uredništva časopisa kojom se potvrđuje prihvatanje i objava rada (engl. *acceptance letter*).
- (8) Minimum objavljenih naučnih radova u naučnim indeksiranim časopisima uređuje se za svaki fakultet zasebno na sljedeći način:
 - a) Fakultet za inženjering, prirodne i medicinske nauke:
 - magistarski program sa tezom (struktura programa 3+2) - jedan naučni rad iz naučne oblasti završnog rada objavljen ili prihvaćen od strane naučnih indeksiranih časopisa ili objavljen ili prihvaćen od naučne međunarodne konferencije;
 - magistarski program sa tezom (struktura programa 4+1) i magistarski program bez teze (struktura programa 4+1) - nije potrebno objavljivati naučne radove u svrhu odbrane završnog rada.
 - b) Fakultet za edukaciju i humanističke nauke:
 - magistarski programi sa tezom i bez teze (struktura programa 4+1 ili 3+2) - jedan naučni rad iz naučne oblasti završnog rada objavljen ili prihvaćen od strane naučnih indeksiranih časopisa ili objavljen ili prihvaćen od strane naučne međunarodne konferencije, sa prezentacijom na konferenciji kao obligatornim uslovom prihvatljivosti naučnog rada.
 - svi magistarski programi na Odsjeku za grafički dizajn i multimediju (struktura programa 4+1 i 3+2) - jedan javno predstavljeni oblik umjetničkog stvaralaštva iz umjetničke oblasti završnog rada;

c) Fakultet za ekonomiju i društvene nauke:

- svi magistarski programi sa tezom (struktura programa 3+2) i magistarski program sa tezom Odsjeka za međunarodne odnose i evropske studije (struktura programa 4+1) - jedan naučni rad u vezi sa temom završnog rada objavljen ili prihvaćen od strane naučnih indeksiranih časopisa ili objavljen ili prihvaćen od naučne međunarodne konferencije;
- magistarski program sa tezom Odsjeka za menadžment (struktura programa 4+1) i svi magistarski programi bez teze (struktura programa 4+1) - nije potrebno objavljivati naučne radove u svrhu odbrane završnog rada.

Član 26.
(Provjera završnog rada)

- (1) Svaki završni rad na drugom ciklusu studija mora proći proces elektronske provjere obima i sadržine podudaranja teksta završnog rada sa tekstovima koji su dostupni za poređenje uz pomoć specijaliziranog programa (engl. *similarity check software*) kojeg je obezbjedio Univerzitet.
- (2) Nadležna služba Univerziteta obezbjeđuje pristup svim članovima univerzitetskog akademskog osoblja specijaliziranom programu za provjeru podudarnosti teksta, a članovi osoblja su obavezni poštovati pravila korištenja programa i povjerljive informacije ne dijeliti sa drugim licima.
- (3) Nadležna služba Univerziteta koja vrši provjeru ima rok od dva radna dana da postupi prema zahtjevu i dostavi izvještaj mentoru i sekretaru fakulteta.
- (4) Na nivou svakog odsjeka će se odrediti proces provjere radova od strane mentora odnosno članova akademskog osoblja tog odsjeka kao i druge tehničke specifikacije uzimajući u obzir specifičnost naučne odnosno umjetničke oblasti završnog rada.
- (5) Mentor je obavezan pregledati izvještaj, razmotriti podudarnosti i ukazati studentu na eventualne korekcije. Kada mentor uoči neprihvatljive nivoe podudarnosti, nedostataka i slično, iako rad formalno ispunjava propisani maksimum podudarnosti i druge tehničke karakteristike, može zahtijevati od studenta, prema vlastitoj procjeni i u skladu sa akademskim standardima i *lege artis* svoje naučne odnosno umjetničke oblasti, dodatne izmjene završnog rada.
- (6) Na prijedlog šefa odsjeka odnosno studijskog programa, vijeće fakulteta može odrediti da se izvještaji o završnom radu iz ovog člana učine dostupnim na uvid svim članovima vijeća. Svaki član komisije za odbranu završnog rada ima pravo zahtijevati dostavljanje izvještaja iz ovog člana na uvid kako bi se upoznao sa rezultatima izvještaja.
- (7) Prilikom korištenja programa i pregleda izvještaja, mentor i drugi učesnici u postupku ocjene završnog rada moraju voditi računa o sljedećem:
 - a) cilj provjere putem korištenja programa za provjeru podudarnosti teksta je da se utvrdi da li i u kojoj mjeri je završni rad originalan odnosno predstavlja rezultat rada studenta i da li i u kojoj mjeri su poštovana akademska pravila citiranja, navođenja izvora i sl.;
 - b) izvještaj o provjeri završnog rada predstavlja samo indiciju o njegovoj originalnosti;
 - c) podatak o količini podudarnosti teksta (engl. *similarity check index*), sam za sebe, nije dovoljan da opravda sumnju u originalnost završnog rada;
 - d) određena količina podudaranja teksta je nužna, kao posljedica citata, ličnih imena, bibliografskih podataka o literaturi i slično;
 - e) ocjena mentora o izvještaju se mora zasnivati na ukupnosti relevantnih kriterija kao što je količina podudaranja, povezanost, smisao i značaj dijelova teksta kod kojih je utvrđeno podudaranje, broj stranica rada i margine, prethodno objavljeni rezultati istraživanja tog studenta u naučnim časopisima i sl.
- (8) Provjera završnog rada propisana ovim pravilnikom ne isključuje primjenu drugih metoda provjere originalnosti rada

XII. KOMISIJA ZA OCJENU I ODBRANU ZAVRŠNOG RADA

Član 27.

(Imenovanje komisije i zakazivanje odbrane završnog rada)

- (1) Završni rad se brani pred komisijom za ocjenu i odbranu završnog rada (u daljem tekstu: komisija) na engleskom jeziku, izuzev Odsjeka za orijentalnu filologiju gdje se završni rad brani na turskom jeziku.
- (2) Student koji je ispunio uslove za ocjenu i odbranu završnog rada obavezan je aplicirati kod vijeća fakulteta za odobrenje odbrane završnog rada sa zahtjevom za zakazivanje ocjene i odbrane završnog rada i dokazom o objavljenim/prihvaćenim naučnim radovima.
- (3) Aplikacija iz stava (2) ovog člana podnosi se najkasnije do redovne sjednice vijeća fakulteta u mjesecu junu tekuće akademske godine.
- (4) Student je obavezan dostaviti dovoljan broj primjeraka završnog rada (nekoričena) zajedno sa dokumentacijom iz stava (2) ovog člana.
- (5) Komisiju imenuje vijeće fakulteta i to najkasnije u roku od mjesec dana od dana podnošenja urednog zahtjeva. Komisija se sastoji od 3 do 5 članova od kojih većina imenovanih članova mora biti iz naučne oblasti iz koje se brani magistarska teza/projekat.
- (6) Mentor je član komisije po položaju.
- (7) U komisiju se mogu imenovati i članovi sa drugih visokoškolskih ustanova.
- (8) Izuzetno, ako član komisije bude spriječen da prisutvuje odbrani završnog rada, kao član komisije može se pojaviti zamjenski član imenovan u odluci vijeća.
- (9) Sekretar fakulteta je član komisije po položaju (bez prava glasa), sa zadatkom za obavljanje administrativno-tehničkih aspekata odbrane završnog rada.
- (10) Komisija je dužna sačiniti i dostaviti izvještaj o završnom radu (kraći prikaz rada, postavljeni ciljevi, primijenjene metode, rezultati i zaključci o realizovanom istraživanju) sa prijedlogom vijeću fakulteta u roku od 21 (dvadeset i jedan) dan od dana prijema rada.
- (11) Vijeće fakulteta donosi odluku o izvještaju komisije i prihvatanju ili neprihvatanju završnog rada najkasnije u roku od 30 (trideset) dana od dana podnošenja izvještaja komisije.
- (12) Prilikom pregleda rada, a prije dostavljanja izvještaja vijeću fakulteta, komisija može isti vratiti studentu na doradu i dopunu, te odrediti rok (koji ne može biti duži od 15 dana) u kojem tu obavezu treba izvršiti.
- (13) Ukoliko komisija ocijeni da završni rad ni nakon dorade i dopune ne ispunjava kriterije potrebne za odbranu iste, predložit će vijeću da odbije završni rad. U tom slučaju, student može podnijeti prijedlog nove teme završnog rada u roku od 30 (trideset) dana od dana prijema odluke o odbijanju.
- (14) Ako vijeće prihvati izvještaj komisije, student može pristupiti odbrani završnog rada po isteku najmanje 7 (sedam) dana od donošenja odluke o usvajanju izvještaja komisije da je student uspješno izradio završni rad.
- (15) Odluka o usvajanju izvještaja i datumu odbrane završnog rada dostavlja se studentu i objavljuje na oglasnoj tabli i internet stranici fakulteta.
- (16) Studenti upisani na jednogodišnji master program sa projektom ne podliježu proceduri predviđenoj u stavovima od 10. do 15. Studentima upisanim na jednogodišnji program sa projektom vijeće fakulteta će na istoj sjednici na kojoj se razmatra zahtjev studenta imenovati Komisiju za ocjenu i odbranu završnog rada i odrediti datum odbrane završnog rada.
- (17) Tok odbrane završnog rada utvrđuje vijeće fakulteta posebnim aktom.
- (18) Dostavljanje odluka studentu iz ovog člana može se vršiti pisanim ili elektronskim putem (zvanična e-mail adresa studenta).

Član 28.
(Odbrana završnog rada)

- (1) Završni rad se brani usmeno pred komisijom.
- (2) Ukoliko se završni rad sastoji iz dva dijela (praktične demonstracije i usmenog ispita) student prvo obavlja praktični dio, a zatim usmenu odbranu pismenog dijela završnog rada.
- (3) Na kraju ispita, komisija će bez prisustva javnosti donijeti jednu od sljedećih odluka: odobreno, odbijeno, ili ponavljanje odbrane.
- (4) Kandidat čiji završni rad je ocijenjen sa odlukom odbijeno može ponovno aplicirati sa novim završnim radom u roku od 1 (jedne) godine nakon odbijanja završnog rada, dok kandidat čiji je završni rad ocijenjen odlukom ponavljanje odbrane može ponovno aplicirati za odbranu iste u periodu od 3 (tri) mjeseca po donošenju odluke komisije. U oba slučaja, vijeće fakulteta na zahtjev studenta imenuje novu komisiju za ocjenu i odbranu završnog rada.
- (5) Student za čiji završni rad komisija dva puta donese odluku odbijeno gubi status studenta.
- (6) Ukoliko student ne odbrani završni rad u tekućoj akademskoj godini, dužan je izvršiti registraciju semestra u novoj akademskoj godini. Izuzetno, ukoliko je student pravovremeno podnio zahtjev za ocjenu i odbranu završnog rada, vijeće fakulteta može odobriti odbranu završnog rada i nakon završetka tekuće akademske godine.
- (7) Završni rad i odbrana su javni.
- (8) Nakon uspješne odbrane, završni rad se predaje u tri primjerka, ukoričena u tvrde korice na Studentsku službu Univerziteta u roku od 3 (tri) mjeseca od dana odbrane, a elektronski primjerak postavlja na repozitorij završnih radova.

Član 29.
(Repozitorij završnih radova)

- (1) Nadležbe službe Univerziteta trajeno čuvaju elektronske verzije odbranjenih završnih radova na drugom ciklusu studija na repozitoriju završnih radova Univerziteta.
- (2) U završnom radu se kao obavezni sastavni dijelovi nalaze sljedeće potpisane izjave:
 - a) potpisana izjava o autorstvu kojom se tvrdi da u završnom radu nema dijelova kojima se narušavaju autorska prava drugih lica. Sadržaj izjave propisuju nadležne službe;
 - b) potpisana izjava da su obe verzije, štampana i elektronska, istovjetne;
 - c) potpisana izjava kojom se ovlašćuje Biblioteka Univerziteta da čuva završni rad u repozitoriju te ga može učiniti dostupnu drugim licima pod uslovima definisanim Pravilnikom o raspolaganju intelektualnim vlasništvom.

Član 30.
(Zaštita rezultata istraživanja završnog rada)

- (1) Izrada završnog rada se vrši u skladu sa pravilima poštivanja i zaštite intelektulanog vlasništva, a u određenim slučajevima i u skladu sa propisima zaštite poslovne tajne.
- (2) U slučaju kada rezultati istraživanja završnog rada uključuju inovaciju podobnu za zaštitu prava intelektulanog vlasništva, student i mentor postupaju u skladu sa procedurom propisanom Pravilnikom o raspolaganju intelektualnim vlasništvom.

XIII. ISPRAVE I EVIDENCIJE O STUDIJU

Član 31. (Diploma)

- (1) Student koji je položio sve ispite predviđene studijskim programom drugog ciklusa studija, odbranio završni rad i ispunio sve ostale obaveze propisane Statutom Univerziteta i ovim Pravilima, stiče akademsku titulu i zvanje magistra određene oblasti, odnosno diplomu završenog drugog ciklusa studija.
- (2) Diplomu, kao javnu ispravu, izdaje Univerzitet.
- (3) Diplome potpisuju dekan fakulteta i Rektor Univerziteta
- (4) Uz diplomu, studentu se obavezno izdaje i dodatak diplomi.
- (5) Do izdavanja diplome, studentu se izdaje uvjerenje o završenom drugom ciklusu studija kao javna isprava kojim se potvrđuje da je student ispunio uslove za stjecanje zvanja iz drugog ciklusa studija kojeg je završio.
- (6) Diploma i dodatak diplomi obavezno sadrži osnovne informacije o završenom drugom ciklusu studija, stečenom zvanju odnosno tituli i ostvarenom uspjehu studenta u toku studija.
- (7) Titule i stečena zvanja na diplomi, dodatku diplomi i uvjerenju o diplomiranju navode se kako u muškom, tako i u ženskom gramatičkom rodu.
- (8) Univerzitet može organizirati javnu dodjelu diploma, a iste se mogu dodjeljivati i po pisanom zahtjevu studenata.
- (9) Godišnja promocija apsolvenata/diplomanata koju organizuje Univerzitet ima isključivo svečani karakter, te nužno ne podrazumijeva i dodjelu diploma.

XIV. PRELAZNE I ZAVRŠNE ODREDBE

Član 32. (Primjena drugih propisa)

Na druga pitanja vezana za organizaciju nastave i način izvođenja iste, te za prava i obaveze studenta tokom studija, a koja nisu regulisana ovim Pravilima, primjenjivat će se Statut Univerziteta i pravila studiranja za prvi ciklus studija.

Član 33. (Stupanje na snagu)

Pravila stupaju na snagu danom donošenja, a primjenjivat će se počev od studijske 2023/2024. akademske godine.

Broj: 01-345/23
Sarajevo, 27.09.2023. godine

PREDSJEDAVAJUĆI SENATA
Prof. dr. Mersid Poturak

Dostavljeno:
3x Fakulteti
1x Studentski parlament
1x a/a